

潞安府志目次

第一卷

星野

第二卷

疆域

里鎮

第三卷

沿革

第四卷

山川

水利
橋梁

第五卷

城池

公署

第六卷

形勢

關隘
驛遞

第七卷

廟學

書院
羣祀

第八卷

風俗

物產

第九卷

田賦

貢篚
鹽法

倉儲

第十卷

古蹟

陵墓
寺觀

第十一卷

紀事

祥異

第十二卷

封建

第十三卷

節鎮

第十四卷至十六卷

職官

第十七卷

名宦

政績

第十八卷至二十卷

選舉

徵辟貢士

封廕仕進

進士例仕

舉人武科

第二十一卷

人物

名賢

第二十二卷

人物

忠烈文苑

儒林

第二十三卷

人物

孝義

潞安府志卷二十一

人物一

川嶽靈淑之氣必有非常之才鍾毓其間上黨山水
雄秀鬱積磅礴宜乎賢人君子後先相望其上者英
名蓋代或且捐軀致命生氣凜然其次爲經世之儒
慈仁之使又其次則文章有成材能備用以及孝行
義舉與夫名流之寄跡高士之行遁要皆爲鄉之人
物也他若小道可觀異學自鳴雖未能與表表人物
并提概論然其事有可傳則亦無妨傳之而已作人
物志

名賢

周

黎侯臣黎侯失國寄居於衛作式微旄邱二詩

仲章潞賢人鄆舒爲政棄而不用伯宗數其罪伐之

羊舌赤字伯華職之子食采銅鞮故號銅鞮伯華左傳

魯襄公三年羊舌職卒悼公問可代者祁奚對曰赤

也可遂代父秩佐中軍尉家語孔子閒居喟然歎曰

嚮使銅鞮伯華無死則天下其有定矣子路曰由願

聞其人也子曰其幼也敏而好學其壯也有勇而不

屈其老也有道而能下人有此三者以定天下也何

難乎哉又嘗謂子貢曰其爲人之淵源也多聞而難
誕內植足以沒其世國家有道其言足以治無道其
默足以容蓋銅鞮伯華之行也

羊舌肸字叔向職之子左傳魯襄公十六年晉平公卽
位羊舌肸爲傅二十一年范宣子逐欒盈殺其黨羊
舌虎等十人囚伯華叔向樂王鮒見叔向曰吾爲子
請叔向弗應出不拜其人皆咎叔向叔向曰必祁大
夫室老問故叔向曰樂王鮒從君者也何能行祁大
夫外舉不棄讎內舉不失親其獨遺我乎晉侯問叔
向之罪於樂王鮒對曰不棄其親其有焉祁奚老矣

聞之乘驛而見宣子曰詩云惠我無疆子孫保之書
曰聖有暮勲明徵定保夫謀而鮮過惠訓不倦者叔
向有焉社稷之固也猶將十世宥之以勸能者今壹
不免其身以弃社稷不亦惑乎若之何以其虎也弃
社稷宣子說與之乘以言諸公而免之不見叔向而
歸叔向亦不告免而朝二十七年晉楚會諸侯之大
夫盟於宋將盟楚人衷甲趙孟以告叔向叔向曰以
信召人而以僭濟之必莫之與也安能害我且吾因
宋以守病則夫能致死與宋致死雖倍楚可也子何
懼焉乃盟晉楚爭先叔向謂趙孟曰諸侯歸晉之德

只非歸其尸盟也子務德無爭先宋公兼享晉楚之
大夫趙孟爲客使叔向待言焉子木不能對歸以語
王曰宜晉之伯也有叔向以佐其卿楚無以當之不
可與爭魯昭公五年晉韓宣子如楚送女叔向爲介
楚王欲敖叔向以所不知而不能厚其禮而歸之六
年鄭人鑄刑書叔向使貽子產書曰昔先王議事以
制不爲刑辟懼民之有爭心也今吾子相鄭國鑄刑
書民知爭端矣將棄禮而徵於書錐刀之末將盡爭
之終子之世鄭其敗乎子產復書謝之十四年邢侯
與雍子爭鄩田叔魚攝理雍子納其女於叔魚叔魚

蔽罪邢侯邢侯怒殺叔魚與雍子於朝韓宣子問其
罪於叔向叔向曰三人同罪施生戮死可也乃施邢
侯而尸雍子與叔魚於市仲尼曰叔向古之遺直也
漢

令狐茂壺關人爲三老正和元年巫蠱起二年七月衛
太子兵敗亡不得上怒甚羣下憂懼不知所出壺關
三老上書白太子寃待罪建章闕下書奏武帝感悟
車千秋復訟之上遂族滅江充家作思子之宮爲歸
來望思之臺於湖

馮奉世字子明上黨潞人徙杜陵武帝末以良家子選

爲郎昭帝時以功次補武安長失官年三十餘矣乃
學春秋涉大義讀兵法明習前將軍韓增奏以爲軍
司空令本始中從軍北征軍罷復爲郎先是漢數出
使西域多辱命選可使外國者前將軍增舉奉世以
衛侯使持節送大宛諸國客至伊修城聞莎車與旁
國共攻殺漢所置莎車王萬年并殺漢使者奚充國
鄯善以西絕不通奉世與副嚴昌計以爲不亟擊之
則莎車日強其勢難制必危西域遂以節諭告諸國
王因發其兵南北道合萬五千人進擊莎車攻拔其
城莎車王自殺傳首詣長安諸國悉平威振西域宣

帝召見韓增曰賀將軍所舉得其人奉世遂西至大宛大宛敬之異於他使得其名馬象龍而還上甚悅下議封奉世丞相將軍皆言宜加爵土少府蕭望之獨以奉世奉使有指而擅矯制違命發諸國兵雖有功效恐開後奉使者爭要功萬里之外爲國家生事漸不可長奉世不宜受封上善望之議以奉世爲光祿大夫水衡都尉元帝卽位爲執金吾上郡屬國歸議降胡萬餘人叛去而先是昭帝末西河屬國胡以西若王亦將衆數千人叛奉世輒持節將兵追擊之爲右將軍典屬國加諸吏號數歲爲光祿勳永光二

年秋隴西羌多姐旁種反詔召丞相御史大夫將軍
議莫有對者奉世曰羌虜近在境內背叛不以時誅
無以威制遠蠻臣願帥師討之上問用兵之數奉世
請四萬人丞相御史兩將軍皆以爲民方收歛未可
多發萬人屯守之且足奉世固爭之不能得有詔益
二千人於是遣奉世將萬二千人騎以將屯爲名典
屬國任立護車都尉韓昌爲偏裨到隴西分屯三處
典屬國爲右軍屯白石護車都尉爲前軍屯臨洮奉
世爲中軍屯首陽西極上前軍到降同阪先遣校尉
在前與羌爭地利又別遣校尉救民於廣陽谷羌虜

甚多皆爲所破殺兩校尉奉世具上地形部衆多少之計願益三萬六千人乃足以決事書奏天子大爲發兵六萬餘人拜太常弋陽侯任千秋爲奮武將軍以助焉奉世上言願得其衆不須復煩大將因陳轉輸之費上以璽書諭之十月兵畢至隴西十一月並進羌虜大破斬首數千級餘皆走出塞詔罷更士頗留屯田備要害處明年二月奉世還京師更爲左將軍光祿勳如故其後錄功拜爵下詔曰羌虜桀黠賊害吏民攻隴西府寺燔燒置亭絕道橋甚逆天道左將軍光祿勳奉世前將兵征討斬捕首虜八千餘級

虜馬牛羊以數賜奉世爵關內侯食邑五百戶黃金六十斤裨將校尉三十餘人皆拜後歲餘病卒奉世爪牙官前後十年爲折衝宿將功名次趙充國卒後二年西域都護甘延壽以誅郅支封爲列侯時丞相匡衡亦據蕭望之前議以爲不當封而議者咸美其功上從衆而侯之於是杜欽上疏追訟奉世前功上以先帝時事不復錄奉世有子男九人女四人長女媛爲元帝昭儀產中山孝王

馮譚奉世長子太常舉孝廉爲郎功次補天水司馬奉世擊西羌譚爲校尉隨父從軍有功未拜卒

馮野王字君卿左將軍奉世子受業博士通詩少以父
任爲太子中庶子年十八上書願試守長安令宣帝
奇其志後以功次補當陽長遷爲櫟陽令徙夏陽令
元帝時遷隴西太守以治行高入爲左馮翊歲餘而
池陽令並素行貪汙輕野王外戚年少治行不改野
王部督郵掾被詔趙都案驗得其主守盜十金罪收
捕並不首吏都格殺並並家上書陳寃事下廷尉都
詣吏自殺以明野王京師稱其威信遷大鴻臚數年
御史大夫缺在位多舉野王上使尙書選第中二千
石而野王行能第一上曰吾用野王爲三公後世必

謂我私後宮親屬以野王爲比乃下詔曰剛強堅固
確然無欲大鴻臚野王是也而卒以少傅張譚爲御
史大夫野王歎曰人皆以女寵貴我兄弟獨以賤野
王雖不爲三公甚見器重有名當世成帝立以秩出
爲上郡太守加賜黃金百斤朔方刺史蕭育奏封事
薦言野王行能高妙內足以圖身外足以慮化竊惜
野王懷國之寶而不陪朝廷與朝者並野王前以王
舅出以賢復入明國家樂進賢也土自爲太子時聞
知野王會其病免復以故二千石使行河隄因拜爲
琅琊太守是時京兆尹王章譏王鳳專權不可任用